


孝義縣志

第肆冊

官司建置一卷  
學校典禮一卷  
物產民俗一卷



DS  
793  
S32  
H7955  
1770  
v4

冊： 4



孝義縣誌官司建置卷一

一代之興建邦啟土必設官分職以司庶事而一  
邑之政則專其責於縣令而又爲之多設科條俾  
克遵循孝義最爾僻壤際累世昇平苟能敬供職  
守則有典有則何不可免於隕越焉誌官司建置  
知縣一員歲食俸銀四十五兩支養廉銀八百兩繁  
費銀一百五十兩額設典吏一十三名役滿考職  
不支工食門子二名轎夫四名傘扇夫三名庫子四  
名倉斗級四名兵快八名每名各歲支工食銀五兩  
六錢九分零皂隸十三名每名工食銀五兩三錢五

分捕役八名禁卒八名更夫五名件作二名舖司兵  
十三名每名各工食銀六兩學習件作二名每名三  
兩民壯兵二十二名每名七兩二錢共額設九十六  
名歲支工食銀六百八兩零

知縣養廉內節次奉文額捐本省公用銀九十八  
兩零繁費內額捐銀九十四兩零又解捐本省公  
事銀若干歲無定額舊制額役名數較今加倍又  
有走遞夫損夫燈夫節次奉文裁定其典吏每多  
缺額亦聽不補充

儒學教諭一員

詳學校誌

儒學訓導一員 詳學校

典史一員歲食俸銀三十一兩五錢二分支養廉銀六十兩 額設門子一名皂隸四名馬夫一名每名工食銀六兩共歲支銀三十六兩

舊有主簿一員前明萬歷二十八年裁去縣丞一員雍正六年裁去

駐防外委一員營兵十名隸太原鎮標汾州營

舊制縣南北路共設傳烽墩台七座令墩長看守修葺順治十五年猶飭查歲修完固不知廢於何時又西鄉兌九峪設有營汛兵弁雍正三年以地

僻撤去

陰陽學訓術

醫學訓科

僧會司僧會

道會司

道會各一名

俱雍正八年奉文查辦始行舉報充應責令稽查  
境內陰醫僧道之不守法度邪言妄語輩並查外  
來遊方僧道舊又設有農官數名以爲力田示勸  
後因他縣有不識法紀傳集農夫滋事者遂於乾  
隆九年奉文裁革

里老人十五名

甲長一百五十四名

專設老人甲長以催本里本甲錢糧老人則擇里

中敬信者爲之甲長則一甲輪年充應於開徵時  
報明某爲本年甲頭徵收畢卽行除去孝義向時  
陋弊凡公私舉動一概派諸里甲長今已久祛而  
仍有責令甲長經理者如出借倉糧雍正二年奉  
文嗣後借給倉糧務令本年甲長戶首查明借領  
人戶額糧多寡按照糧數領出分給各戶現勒石  
遵行是甲長又不止專催額糧矣是邑正賦從無  
逋欠賴設里甲長之故而借糧不免層遞剝蝕則  
亦利弊均焉

鄉地 百

卽保甲之法而稍變通之保甲每十家一牌頭未免過密民生樂業相安無事牌頭雖設莫記誰何且十家之中又未必能以一人身充官役也十保一鄉約又未免過疎平民才識有限又事權不屬責令稽查隔處村庄自必耳目難週故止於居民團聚處所數十家之中設一鄉地或正副兩人令其專一稽查爲匪爭毆事件多亦不過一二百家或村鎮廣濶人戶繁多則設數鄉地分管孝義舊有鄉地惟是遞年輪充並或有遞月遞日輪充者每遇事件鄉地以不知往事推諉茲令各具長充

鄉地保認狀並投所管係某村某戶若干冊檔非  
因事革退不許私相更換昨年曾飭令城鄉按戶  
派夫輪值巡更夜守宵小漸次屏息今又此舉似  
覺滋擾乃始經更定長充若輩咸知各有責成其  
一切非法事或呈請示禁或公張禁約然後知此  
舉之爲益不少也雖然 朝廷立法里甲保甲層  
層約束固所以制愚頑捍戾之萌而不肖者亦未  
嘗不藉臂指之用行其網利營私之計在立法固  
不能保其弊之不生惟奉行得宜則撫綏卽寓於  
防維中也

朔望宣講

上諭在城內外共四處東門內太平寺卽官員朝賀處南門在魏文侯廟北門在元武廟西門在城外廣濟寺  
我朝

聖祖仁皇帝頒上諭十六條

世宗憲皇帝御製萬言廣訓推衍十六條之義詔內外臣  
工月吉講解今

皇上詔臣工於宣講

聖諭後兼講諭律令如周禮讀法之制福民覺世已本末  
鉅細無所不該而晉省前暨憲王又樸又以山西

方音衍釋

聖諭前撫憲準

又令沁州知州雷暢擇律例內有山西民情所易犯者亦以方音衍釋其於名言大義皆如說家常事是皆仰體

宸衷欲令愚氓聽聞曉暢宣揚德化莫此爲切

申明亭卽北門內元武廟外懸一額曰申明亭


趙誌載申明亭在縣署大門左今不惟無所申明卽亭亦烏有矣又載公直所在縣署前知縣劉令譽所建每日派鄉正副二人書官政得失云尋廢知縣署城西門內十數步悅禮坊南宣化坊北元魏

孝靜帝武定元年築城建署元初盡燬至元丁亥知  
縣王恕重修記載藝文大德七年地震復圯次年知  
縣郝思敬再新明天順二年知縣王佐宏治六年知  
縣張日昇

國朝知縣高佩均相繼增修


縣署圖

典史署圖



官司建置

六



縣署基址方廣可十畝許內外房舍約百餘間然  
無一完善余自抵任補葺無虛日語云官署如傳  
舍其信與趙誌載大門左右有旌善申明二亭今  
廢方誌載宏治六年張令建鐘鼓樓於儀門內東  
西兩旁正德間閔令築方臺虛其下爲頭門移舊  
鐘鼓樓於臺上顏曰作新不知何時悉撤爲今門  
去門數丈屏以墻墻之左右各爲柵門頭門內東  
邊南向爲秦叔寶廟廟後西向爲戲樓卽舊之土  
地祠迎賓館也戲樓前新建面北捕班房西邊東  
向爲壯班房卽舊時碑亭稍北又東向廟三間祀

馬神關帝土地廟前左右屋爲皂班房再北卽接儀門門外古槐二株門內左右又爲北向壯皂班房各一班房之前東往典史署署南向而門西向西往禁獄由儀門北行中爲戒石牌牌北東西對向小房各一爲皂隸直宿處堂中砌臺爲煖閣煖閣東舊有縣令題名碑蓋前尹劉大觀所建當時有循政云堂前後有諸扁額頌張令繩武曰藻鑑如神頌陸令拱辰曰愷悌允洽頌汪令嘉濟曰成臯清操頌方令士模曰兩邑神君其曰神明父母則今商民爲余製神明余曷敢喜其信余抱此區

區耳偶然遊宦姑置爲雪泥鴻爪可也堂兩廡東則吏戶禮承發西則兵招刑工倉諸書吏辦事房屋吏房之北有蕭鄭侯廟兵房之北爲茶房亦東西向再北爲東西兩快班房乃皆南向其東快班房卽舊之贊政廳也煖閣後東西隅爲庫房後卽宅門內堂宅門以外凡書役值宿房屋猶修整完好則以不能視如傳舍故也向來宅門矮而深坐內堂視事昏暗不能遠矚堂則橫長如廊又高並兩廂無尊卑分別余爰改構之余生平紙窗竹屋不求居安獨惓惓於是者異爲向明之助兩堂

前有東西兩廂堂東有西向書房三間堂西有南向書房三間再西東向爲廚房廚房南有橫屋三層內堂後有廳屋五間廂屋六間最後窰房三間平其頂構樓於上顏曰涵高鏡遠則康熙年間高令之所增而杜令之所題也自宅門內週遭夾牆爲更夫巡行路東牆外卽舊縣丞廢署地西牆外卽舊主簿署再西爲馬道有馬神廟前明主簿奉裁周令卽其署爲喜雨亭康熙年閔令又更爲花亭顏其廳曰鸞廳殆亦有慕於前令楊仲昌鸞巢於庭之意乎乾隆三十三年王令將去乃撤鸞廳

置於縣丞廢署地爲增建常平新倉開銷官銀若干兩報司存卷彼視官署如傳舍者不又賢於斯乎於是僅存極北破屋三間余加黝聖掃除中增月門其南植柳樹五株兼置雜花芳芷卷石盆魚爲簿書憩息地易名慕陶軒云

儒學

教諭署詳學校誌訓導


典史署在縣署儀門內之東增建新倉之南其創建增修俱無所考


駐防營房在宣化坊舊察院行署之北計二十四間舊時在縣署後牆西邊雍正二年知縣方士模移

建今營房前院房十二間後院房十二間外門一座照牆一座按前明衙署外又有各上憲行署其察院署在今縣署之東十數步外今爲空地方廣可四畝許布政司分司在悅禮坊中陽樓東路北今亦空地可二畝興寧道署舊誌載在宣化坊街南今城內西南有空地二畝許或卽其處又縣署南有南館明嘉靖時劉大觀又建候館於南鄉之王屯村有記今皆故迹無存何舊時行署公館不一其數今則每上憲按臨必借民房棲止其廢墜之咎實由來已久

常平倉二區一在宣化坊倉巷路北窪廠十四間房  
廩十八間一在縣署東邊舊縣丞署故址房廩六  
間

常平倉圖





趙誌載預備倉在城內東南隅正統間知縣高鵬  
建卽今常平倉乾隆七年奉查常平倉廩修建始  
末以爲創於正統間按常平方誌內始有而載預  
倉在尚義坊街北常平倉在宣化坊文廟巷則實  
誤詢諸故老知舊常平在今建義學處屬尚義坊  
第不知何時併入預備爲今之常平倉又趙誌載  
六坊廂俱有社倉給老人監守民苦不便欲併於  
預備倉側合作二社倉今坊廂社倉故迹無存然  
其利弊不在倉之有無及分併間也其縣署東房  
廩舊有三間新又三間乃三十三年王令將去時

所增建者

教場一所在西稍門外偏北方廣二十畝

方誌載明正德間閔令變橋北城西悅禮各坊廂  
之申明亭地價買置西關民地二十畝圍墻種柳  
築臺建廳後僅存基址云邑有陰陽生設以傳請  
紳宦無工食以教場餘地及北門西邊城濠地三  
畝給其糧食

舖司房惟北路田屯舖有房三間旁有熟地五畝給  
該舖兵耕種

趙誌載除大路舖司外城廂又共設二十一舖俱

孝義縣誌

簽民夫直宿巡守今無官置窩舖聽民自於公所  
設立亦不簽夫惟按夜聽民自派輪流守望

養濟院一所在橋南廂路西房屋十間額收貧民十  
名每名月給口糧米三斗

留養局無房屋每歲舉行於南關十方院散給貧民  
錢米乾隆二十四年所買地畝不妥三十五年知縣  
鄧必安拮措更買及所增添共地一頃九十七畝六  
分歲收租銀八十三兩七錢三分其不敷用仍屆期  
捐辦

康熙十七年撫憲王

倡捐留養每縣發銀三兩

本府憲曹 捐發銀六兩令州縣官各再量捐於  
隆冬收養貧民給以棉衣錢米自是疊奉撫藩憲  
飭行於每歲十一月初一日起春融止孝義歷係  
本邑官紳捐辦嗣以給散所餘之銀存留生息乾  
隆二十四年奉文飭將本息銀置產贍給時存銀  
六百三十一兩八錢零於是年開銷銀一百一十  
四兩零報脩各處留養房屋其實房屋烏有又五  
百一十七兩零草率買地若干後各佃戶卽以地  
薄懇退浹歲比追租銀余來蒞茲親見一則苦受  
笞責一則安享利賴揆之鳴鳩飼子之義安在於

是向原買地經事人退還地畝追收地價余並捐銀百兩又以龍鳳菴僧榮安控審張姓霸佔庵地改輸銀二百兩徙置甘肅之犯沈某施寄房價銀三百兩

二宗俱有  
卷存房

併舊存共銀一千一百一十七

兩督禮戶庫書趙連級劉成湯任天永覓地購買買到南河地八畝南曹村地三十七畝五分又六畝趙家庄地三十四畝六分寺家庄地三十七畝任坊村地三十畝宜興村地二十一畝邀舖村地二十三畝五分各買契存戶房更諭三書辦歲查農佃惰荒地隣侵越務效于公之爲獄吏者然竊

余承辦三十三年三十四年留養雖蒙記功然其  
果無凍餒固難周知且即使盡已留養終不如家  
給人足之爲愈也

普濟堂在北稍門外路北關帝廟之右

窑房三眼

育嬰堂在南稍門外路西東向

瓦房三間雍正年始行建設然自設後從未濟一  
老病育一嬰孩徒存其跡而已

監獄一所在儀門西邊乾隆三十四年知縣鄧必安  
盡脩其朽敝

圍牆二層獄神廟一間禁房六間更夫房一間乾隆  
年奉文始設更夫五名又增禁卒二名其  
工食於各役內攤給

論曰徒善不足以爲政徒法不能以自行所從來  
矣我

朝法制嚴明無一非宜民之政然舉而措之神而明  
之又或陽奉而陰違之在黜陟之典枉直不淆抑  
亦筮仕之志趨早自異也

孝義縣誌學校典禮卷一


王制所在莫敢不遵其所以祇承明命風示後進者固不僅奉行之迹然名以命之數以紀之又安得舍切近而空言元渺乎夫可使由之者民也而從而振德之者亦不在士也茲謹按


國家成憲誌學校典禮

文廟宋大觀年間知縣董元愷創建於城內東南隅屬今尚義坊元貞中知縣董完澤續修嗣以地震圯於大德七年次年知縣郝思敬重建有記明洪武中知縣陳莊天順中沈純成化中王佐宏治中張日升正德

中閔以仁嘉靖中董愷萬歷中周佑劉令譽均加修  
葺今乾隆三十四年知縣鄧必安增修記載藝文春  
秋致祭其從祀位次及諸祭儀一遵會典每祭支用  
地丁正項銀二十兩

學宮圖





乾隆三十四年孝義學宮惟大成一殿巍然獨存  
東廡及圍牆已墮成平地他亦傾欹剝落池堙橋  
圯知縣鄧必安建新理舊始得完善大成殿旣加  
丹雘增懸門額而其臺基低於殿前兩廡業難增  
築惟於丹陛上週圍砌欄牆使高低不見而已兩  
廡則新其一葺其一前爲大成門三座亦增懸門  
額門外泮池及橋均葺如舊池東爲名宦祠池西  
爲鄉賢祠池前爲櫺星門向時官役出入俱由櫺  
星門南北行今旣新四面圍牆因於東西牆各開  
一門東額德配天地西額道冠古今字額設禮生

四名生員充應份生四十名由儒學申學憲充補其樂器舊存一鼓一鐘祭器舊有銅邊銅爵餘皆乾隆十七年邑紳捐制但祭樂器均未設有庫貯祭器則徹於儒學私署樂器則平時亦設於正殿均失敬謹今擬擇學署空房爲收貯之所

崇聖祠在大成殿東北與大成殿同時修建亦遵會典春秋致祭每祭同名宦鄉賢二祠共支用地丁正項銀六兩零

按祠建在大成殿東北學署明倫堂之側祠宇低小已屬非是又止一門前無屏蔽則猶露處也三

十四年始加門外圍牆因陋就簡亦無可委咎焉  
文昌閣在大成殿正東乾隆三十四年知縣鄧必安  
新建春秋同上丁日致祭

文昌六星見史記天官書歷代祀之以其爲文星  
也舊在學宮東北圍牆盡處雍正十二年邑士人  
田建疆等所建余嫌其幽僻因於大成殿東築臺  
建閣固文明之象應爾又以拱衛

文廟壯觀瞻也閣前布武可百餘步建門於東以昭專  
祀按學校首

文廟遵憲典崇聖學也而文昌閣及名宦鄉賢忠孝諸

祠皆建於學宮之內者均示觀感之意故不入典  
禮而隨載

文廟之後

名宦祠在櫺星門內倚東面西內祀 吳 起

房元齡 杜審言 楊仲昌 朱守謙 齊 政

衛 健 沈 純 李 瓊 張日升 閔以仁

王 錦 陳 情 申朝紀 白秉正 張泰孚等

十六人事蹟別爲傳與鄉賢祠俱遵會典春秋兩祭  
三十四年修學宮時各祠牌位多朽腐字漫滅不  
可識查照舊誌更製供奉按吳起有功於西河祀

之可也房杜二公則當日止爲隰城尉卽今之汾陽縣孝義在唐時未嘗隸隰城乃不祀於汾陽而祀於孝義若申朝紀曾爲山西巡撫政蹟皆關一省何以獨祀孝義白秉正方誌止載山西總督政蹟鄉里已云無考遍查各職官書並無其人惟白如梅所著撫晉奏議載順治十五年撫山西時奏免汾平孝三縣所逋欠王宗租銀或因祀焉而如梅之果卽秉正亦不可考又山西省誌名宦內有孝義教諭李詔而孝義又不祀且入祀名宦皆由題請何故舛錯若斯文案無存莫可稽考謹仍其

傳而已

鄉賢祠在櫺星門內東向內祀 辛慶忌 鄭興

辛仲甫 武 賢 霍 冀 趙 訥等六人事蹟

亦別爲傳祭遵會典

現祀六人俱照方誌第乾隆七年奉查鄉賢祠牌位止冊報五人而無鄭興意以鄭興已專祀忠孝

祀與

忠孝祠在學宮內東北隅祀孝子鄭興與鄉賢祠同

日致祭

康熙五十五年知縣周衍特建祠於北門內之元

武廟側以祀孝子鄭興乾隆十五年知縣李方泌  
移建於學宮東南隅改舊祠爲節孝祠以祀節婦  
蘇氏乾隆三十四年知縣鄧必安建文昌閣於大  
成殿東以舊文昌祠祀鄭孝子爲今祠而今之學  
署大門卽李令所建之忠孝祠也

儒學設教諭一員歲食俸銀四十兩訓導一員歲食  
俸銀四十兩共額設膳夫二名每名歲支工食銀六  
兩六錢零齋夫三名門斗三名每名工食銀六兩

舊制設教諭一訓導二其一在教諭署之西萬歷  
二十八年裁去

儒學署在大成殿後亦建於宋大觀中歷代隨時補  
明宏治二年知縣張日升大加修理有記

大成殿後正中爲明倫堂堂前東窰房五間曰博  
文齋西窰房五間曰約禮齋又前爲東西門東曰  
禮門西曰義路三十四年余俱次第補葺堂後教  
諭宅正廳五間再後內廳五間東西廂各一堂西  
書屋二間卽已裁訓導宅堂東今訓導宅內廳三  
間廳前東西廂房各二間又前外廳三間其義路  
門外築重牆隨大成殿而南爲門南向禮門外北  
卽啟聖祠祠南數百武爲學門屋三間署儒學門

卷之三  
額東即文昌閣閣左重牆亦隨大成殿而南舊時  
學署大門在今文昌閣之東斜行側出體制不稱  
余旣建文昌閣乃移忠孝祠於北而以舊祠爲今  
門統計學宮基址東西廣三十六丈南北袤五十  
八丈前明二百餘年修葺凡八

國朝已百餘年矣不聞司土者過而問焉是可慨也  
舊有射圃廳敬一亭育賢倉又諸生號舍二十八  
間講堂五間方令修誌時已悉廢而猶存神厨神  
庫宰牲所各三間今則盡烏有矣

學田一頃二十四畝七分八釐前明邑紳霍鍾瑜

捐置學租納糧外散給廩生貧士銀四兩八分每歲底冊報司府

義田三十畝康熙四十六年署縣阿爾布捐置每年收租銀九兩有碑文可考見方誌今每三年儒學書吏僅收租銀一十二兩供諸生歲試買卷之費餘銀一十五兩係何人侵蝕無案可稽

禮生地三十八畝邑紳霍 捐置係 文廟四禮

生公用

額設廩膳生員二十名每名歲支廩膳銀三兩二錢零增廣生員二十名歲科額入文武生各十二名其

撥入府學無定額

今見有歲貢生八名肄業廩生二十八名增生二十四名附生一百六十七名武生一百九名告頂文武生共三十四名

鄉會試及生童考課每科額設一進士旗匾銀四兩一舉人旗匾銀三兩舉人建坊銀七十五兩三舉人會試路費席餞銀六十二兩貢生赴考席餞路費及考中花紅銀共十二兩俱支用地丁正項生員赴鄉試知縣餞送用邑人所捐地畝租銀學憲歲科取錄生員自三等三名以上及新進文章獎給花紅俱縣

官捐辦

舉義於

國朝百餘年來登制科者止二人舉人會試多亦不及三名其會試路費雖額設六十餘兩第係解司通融給發實每名領銀不及十兩賓興席餞取用地畝租銀據霍氏子孫言係康熙十二年伊祖霍焜所捐城東義塚餘地歷係霍姓子孫耕種歲納銀五兩零


義學一區在城內東南隅

文廟東數十步乾隆二十一年知縣莊行恭建延師訓課

撥地耕種並各地租銀又歲捐銀十二兩給義學師  
爲束脩歷今照舊規無增損

# 義學圖





一明萬歷時橋南廂有義學十六間久廢康熙五十二年知縣閔衍延師於北門鄭孝子祠內教授童蒙以康熙四十六年署縣阿爾布所捐義塚墳地六畝給蒙師種食雍正三年知縣方士模移設南稍門上乾隆二十一年知縣莊行恭始於已廢常平倉地特建正房三間東西廂各一稍前廳房三間前院一所建門南出

義學地一種城外西北魯家墳之西卽義塚計地六畝一收中陽樓東官地卽舊時布政司行署所在計地二畝租銀一縣署前舖基地六處每處

租銀三錢又場地一塊租銀一錢一西門外坊間房  
地一塊租銀一錢一橋北廂城隍房地二塊租銀一  
兩一錢又舖基四處租銀二兩一橋南廂河柳巷場  
地一塊卽舊時義學所在租銀六錢又街西北一塊  
卽舊時養濟院所在租銀二兩

趙誌載萬歷時知縣劉令譽設養正學於六坊廂  
講約所以訓童蒙後廢乾隆九年奉文民間所建  
三教堂其已置有地畝者移出聖像聽僧道居住  
其未置地畝者移出佛像改爲社學時孝義報社  
學八處而訓讀事悉未舉行今雖有義學一所第

每歲所收約銀三十兩內外給蒙師且不足焉能  
及他余抵任亟欲建立書院謀諸老成乃衆不吝  
於貲而有畏累之色初甚不解嗣聞乾隆二十三  
年前令莊銳意振興而爲多事後生所撓隨檢查  
舊卷乾隆二十二年僧人吉成有在官銀四百餘  
兩莊令請以此銀擴充義學房舍奉批允行而邑  
紳某某等聞風踴躍呈請加捐已貲特建書院於  
已廢察院行署舊址莊令隨造具樂捐姓名銀數  
並估工料冊檢據情轉請蒙各憲批允並飭獎勵  
時邑人無不懽欣已報捐銀七千六百餘兩並已

購料若干擇日興工矣乃有生員任學翰受人指  
使忽以書院細事捏控上憲於是邑人不樂經理  
莊令亦忿債事者出於衣冠先達因於二十四年  
謁病以去事遂中輟而事後猶滋訟八載致輸捐  
人被累無休至今猶如談虎夫書院之興廢庸有  
儒生自好而富室吝財乃今反是豈忌功他人抑  
恐小子有造致前賢畏後生耶是則穿窬之類誠  
無足論獨惜其垂成之功墮於一旦且自是以後  
人愈不以斯文爲重至今無一登鄉會榜者藉非  
朝廷設有生員額數幾不知有所謂學校者矣余今

老憊不能爲多士久遠計誌此以待後之有志振興者余之厚望亦多士之厚幸也

典禮

官員朝賀所元旦長至

萬壽於東門內太平寺設

萬歲龍亭官員遵會典朝服行禮

寺爲金天會三年僧人智遠建令節設

龍亭於正殿內門右爲戲樓左爲朝房我朝

帝德廣被每遇令節普天同慶第庶民祝於家膺爵秩者理應隨地方官拜祝公所邑紳宦素不諳曉余

爲持帖傳請俾知邀一命之榮卽有臣僕之義  
迎春立春前一日於東郊龍王廟傍設厰置芒神位  
官員行禮迎入縣署頭門內設厰安放翼日再行禮  
於芒神前支用地丁正項銀七錢五分

龍王廟在東門外三里許一名觀陣樓又名大聖  
樓曲禮月令天子迎春東郊今制爲通禮所以授  
時正日而孝邑向例是日差傳六坊廂裝演臺閣  
諸戲糜費不貲事屬無益余爲革去餘遵會典

耕藉在城外東北里許關帝廟西藉田四畝九分遵  
照躬耕藉田之北先農壇廟各一每歲奉文耕藉日

# 先農壇圖

致祭

卷之四



藉田親推後召農夫畢佃收穫日半給農夫額貯  
一石 斗備各壇廟祭祀案盛先農壇高二尺一  
寸南北長五丈二尺東西濶二丈五尺先農廟正  
殿三間配房二間門樓二座圍牆週環九丈  
鄉飲酒禮遵照會典舉行春冬二次共支用地丁正  
項銀十五兩

按鄉飲爲激勵盛典奈久未遵倣近始脩舉廢墜

賓興禮知縣偕寮佐優餞應試生於北郊

其支用銀見前卷末

社稷壇在城北二稍門內路西遵會典春秋二祭同  
南壇諸祭共支用地丁正項銀二十四兩

是爲北壇壇高二尺一寸長二丈五尺濶二丈壇外爲牆週圍二十八丈門樓四間禮天子郊郡邑皆立社亦守土之義

風雲雷雨山川壇南稍門外路西遵會典春秋二祭是爲南壇壇置與北壇同風雲雷雨之祭自唐始而各壇以祭明初詔風雲雷雨山川合祭一壇

國朝因之

雩祭屆期祭於山川壇奉文歲一致祭支用地丁正項銀三兩

乾隆七年奉文設立雩壇歲以六月致祭爾時未

另設立卽祭於南壇按虞書禋於六宗註六宗一曰雩祭水旱也春秋書大雩孝邑因南壇以祭亦缺典也

邑厲壇在城北大稍門外路西奉文清明日七月十五日十月初一日歲三祭共支用地丁正項銀一十二兩

厲壇殆子產所謂鬼有所歸乃不爲厲之意古有泰厲公厲族厲之祭明制州邑悉建厲壇

國朝因之壇高二尺一寸週圍築牆南北長 丈

尺東西濶 丈 尺

八蜡廟在西稍門內路北南向奉文春秋二祭

廟三間內安各神位八蜡見於禮記註曰先嗇

司嗇 先農 郵表畷 貓虎 坊 水庸


昆蟲 諸神是爲八蜡 按八蜡乾隆六年奉文

同南北二壇共支用祭祀銀二千一百兩乃十餘年  
來忽而不祭今遵照舉行

城隍廟在城內西北隅悅禮坊廟南向創建無考歷  
代俱邑人續修有碑存廟乾隆二十二年邑人李城  
等倡首增修頗極壯麗住持道士一名香火地九十  
五畝八分官員朔望行香每歲七月二十三日闔邑

寶會獻香供

# 城隍廟圖



學義孫志

學校典禮

五

廟基西北俱挨城下馳道南至中陽樓之西街南  
北凡數百餘步最後內殿五間東西廡各五間前  
爲正殿五間東西廡亦各五間殿東卽龍王廟屋  
三間耳房一間殿前門屋三間上爲戲樓樓前十  
數步爲中門一座門西道士住宅南向三間東西  
向小房各三間中門外數十步保障中陽牌坊一  
座坊前數十步大門三間門外圍牆一週東西門  
各一座東出卽西街西出卽城下其地畝留傳年  
遠不知誰何所置方誌載廟建於元大德九年知  
縣郝思敬而廟內立有金永安四年重修碑則實

非元時所建 按隍池也城隍主城池以捍衛斯民者也故祀之自唐時始後世又加以封號而邑人更以七月二十三日爲神誕辰

龍王廟在城隍廟東南向東卽沙姑巷春秋致祭

自宋時始有五龍九龍之祀

國朝詔天下祀龍神以龍能興雲雨也孝邑舊時祭於東郊卽所謂大聖樓者乾隆十一年知縣薩穆哈率邑人建廟於此

西河神廟在護城堤內鐵匠巷之南西向明嘉靖間邑紳建每六月初六日官爲致祭

孝河爲患久矣廟祀河神祈安流也爲屋三間

東河神廟在城東里許尚家庄南護城堤上南向明  
萬歷三十四年建與西河神廟同日致祭

窪房三間有樓中爲空院又南樓一座

火神廟在城東門外街南南向不知何時建

廟三間

元武廟在城北門內西向

元武卽古所謂元冥水神也按水火民之司命守  
土者皆不可以不祭

馬神廟在縣署儀門外東向春秋二祭

廟屋一間周禮注校人春祭天駟夏祭始養馬者  
秋祭始乘馬者冬祭馬步神爲災害馬者今統祭  
於春秋二仲月

土地祠在馬神廟左亦春秋二祭

按縣官旣祭社與城隍矣何又祭土地禮士祭五  
祀一曰中雷土地此亦縣署中雷之義非一邑之  
土神也

祭旗纛神霜降日教場設位以祭

邑舊額存留項內有霜降祭銀一二兩後改營員承  
辦

關帝廟在城外東北隅距城數百武奉文春秋二祭  
五月十三一祭並祭三代共支用地丁正項銀二十  
兩八錢零

廟圖並先農壇圖  
已見前藉田誌

邑城東門內舊有三義廟以俗傳桃園三結義之  
說供奉劉關張神像三座

國朝詔州縣春秋祀關聖時未別建專廟因歲祭於  
此廟三神像之前甚屬非是因改祭於今廟而功  
令並祭三代廟無後殿余爲叙其應改祭之義勸  
里人增建而後祀典始正叙存藝文誌增建後殿  
屋並基地費共銀五百兩有奇余捐銀一百餘俱

里社所助是役貢生張元仁賢勞居多廟西北所  
培隙地原擬創建卜子專祠因資斧不繼暫時中  
輟其詳見藝文內司訓王竣功請改正祀典議

四賢祠在宣化坊南向面城內祀卜子夏段干木田  
子方吳起春秋二祭

祠屋三間舊爲三賢祠不知始祀何時又不知何  
時益吳起爲四賢

魏文侯廟在四賢祠東春秋二祭

亦不知始祀何時廟三間耳房二間戲樓一座與  
四賢祠同建方臺之上故又稱魏王臺

卷之三  
節孝祠在城北門內元武廟南內祀節婦王蘇氏事蹟別爲傳

祠屋三間門一座舊爲忠孝祠乾隆十五年知縣李方泌改忠孝祠於學宮內祀蘇氏於此按孝子鄭興節婦蘇氏均非專祀第後無繼請入祠者孟公祠在橋南廂官道東明萬歷時邑人公建以祀知縣孟道溥事見列傳

窰房三間前院一所爲門西出古未有廟而不祭者而孟許二祠年來享祀缺然豈澤久而湮乎

許公祠在城北大稍門外關帝廟後明萬歷四十八

年邑人公建以祀知縣許宗禮事見列傳

窰房三間一小院出入由關帝廟按碑載房屋甚多當由後以餘屋爲廟也又北門城上舊有陳公祠祀康熙年間知縣陳之文今不百年而故跡無存焉

論曰學校以六經取士欲其究聖賢之蘊見諸行事也典禮達於州黨欲其奉一王之制化成天下也顧或以之干祿而尚不工習爲故事而猶不舉滅棄不已甚乎夫君臣父子之倫非學弗明仁義忠信之德非禮無行不明不行其敝豈止樸陋無

文而已哉

孝義縣誌物產民俗卷一

物產於地而有陰陽水旱人事之不齊俗成於民而有鍾毓化導積漸之異致苟消長美惡任其自爲則亦安用此長民者爲哉而欲爲之盈虛調劑救弊補偏非洞燭乎纖悉隱微末由致力也然書不能盡特揭其大端爲物產民俗誌

物產

氣候則多寒少燠多風少雨每秋分後卽凝霜不俟霜降也立冬卽栗冽堅冰草木盡落至次年雨水節冰始泮驚蟄草木始萌動清明後始漸次甲拆一歲

中草木蔥蒨時纔四月餘耳每不數日必發風揚塵  
故土多燥而鬆最喜冬雪若自立冬至冰泮時能積  
一尺則麥收大稔頻年不過二三寸若無積雪則有  
渠水地猶可旱地卽顆粒無收春雪亦少惟自小暑  
至處暑多連雨而斯時第蕎麥可入種大約春雪一  
尺不如冬雪一寸夏秋雖連雨又不如春雪之益

米糧則有麥

大麥

黍

稷

粱

卽粟米

豆

高粱

一名黏黍

莠麥

燕麥

卽油麥

芝麻

胡

麻

麻子

豫黍

麥高粱宜通渠水地粟穀黍穀糜子兼可種向陽

旱地惟豆處處可種坡陰山地止可種油麥苽麥  
而已芝麻胡麻麻子豫黍所產不多麥有二種俗  
一名宿麥一名春麥宿麥白露時種夏至始熟其  
粒堅而微白春麥有大小二種皆春分時種夏至  
時熟小麥粒鬆而微赤大麥可去皮同米食亦可  
作麴作餻高粱黍屬而苗高大稞粒亦較大立夏  
時種寒露時熟粟米黍米稞粒畧同粟米圓小如  
霰而黍米畧大有二種秔曰軟米宜釀酒俗呼糜  
子秔曰硬米皆種於立夏收於秋分苗如黍而稞  
粒微大者曰稷麥之下惟粟米爲多豆有數種豌豆

豆春分種扁豆清明種俱夏至收黑豆茶豆俱穀  
雨時種秋分後熟羊眼豆黃豆白豆俱同黑豆時  
種熟差早虎豆又名菜豆粿如手指大穀雨種小  
滿卽收熟最易而種不多豇豆菜豆俱立夏種白  
露收小豆立夏種秋分收小黑豆小暑種秋分熟  
諸豆惟黑豆菜豆小豆種尤多油麥有夏秋二種  
夏油麥 種 熟秋油麥 時種 時  
熟莢麥又一種名苦莢俱小暑時種秋分時熟莢  
麥小黑豆糜子俱刈麥後可復入種故良田一歲  
能兩收通計所種大約高粱十之一豆五之一麥

亦五之二穀二之一苽麥油麥諸色四之一  
多土瘠雖豐歲亦不贍一邑之食多藉外來商  
自延榆歸化等處木筏裝載由黃河而下至永寧  
之磧口復陸運經寧鄉至孝南販多止孝義汾介  
又自孝義買去故歲藉補給又獲商人之利焉

園蔬則有山藥 西瓜 甜瓜 王瓜 南瓜 冬

瓜 絲瓜 番瓜 白菜 萊菔 俗呼羅蔔 胡羅

蔔 菠菜 芥菜 瓠子 茄子 蕪菁 花柳

秦椒 韭菜 勃蘭 蔓菁 蒼蘆 苘苳 豆

角 刀豆 卽板豆 蘆荳 芥菜 苜蓿 木針 金

針 蘑菇 木耳 甜薺菜 苦薺菜 莧菜 馬

齒菜

果 蕨則有核桃 棗 葡萄 林檎 桃 柿 梨

杏 李 大紅果 小紅果 蘋果 木瓜 石

榴 無花果

山藥穀雨時種於園地霜降後掘地而取南鄉民  
多種如藝禾麥焉諸瓜皆穀雨時種於沙地入夏  
後漸次結實邑人多業圃瓜及山藥皆出鬻鄰里  
諸菜中白菜蘿蔔尤多秦椒亦多花椒間有蔥蒜  
則每食必及苜蓿西鄉民種以飼馬初發葉熾可

食木耳菇長於深山楷木上亦甚少  
菜馬齒皆地中自長不甚佳間有取食諸菓惟核  
桃棗葡萄林擒桃柿梨頗多餘悉少有核桃有出  
鬻外縣其樹亦堅實紋理細密取爲諸器具頗佳  
石榴無花菓可供盆玩

物畜則有牛 羊 驢 馬 騾 貓 犬 猪

山獸則有兔 狐 狸 鹿 麋 麇 禽畜

則有鷄 鵝 鴨 山禽則有雉 鴿 石鷄 水

則有魚鱉

頗產牛羊牛則西山耕地必用本地所產一牛獨

犁不能用驢騾並不能用外來之牛羊則近城地  
多圈羊積糞俱僅足供本地用無出鬻也又近城  
地多用驢騾馬匹負載耕種不肯用牛本地不多  
產半須外來鷄犬貓家家養之鵝鴨惟東鄉近河  
地能畜一二猪則千家之中飼者不過二三皆販  
自陝西經汾陽來向時猪賈多止孝義東南州縣  
又自孝買去居民鋪戶頗獲此益今則商或經此  
而南其止孝義者不及向之三四山雖多所產僅  
雉兔餘俱偶然有之魚鰲惟汾河間有之孝邑近  
河居民向有業取魚者因謂獨產孝義

木則有柳 榆 槐 楷 樺 楊 松 香栢

桑 椿 楸 穀 桐 櫟 楸 草則有蓖麻

藍 蒿 老來紅 苙草 艾 益母草 櫻櫚

一惟柳榆槐每於清明時栽插多資此爲諸器皿他  
則楷木樺木生西鄉面南諸山中質堅理直可勝  
梁棟而聽其自長罕加攘剔惟近村傍舍多栽榆  
柳利其易長便用而不知十年之計樹木有土之  
山皆可也松栢土性不宜而香栢頗多亦宜桑而  
人不栽種餘悉少有有亦無成材者汾河旁多栽  
蒿其梗森森細而長秋冬取作蓆近河居民多業

此間有出鬻鄰邑蓖麻栽以取油老來紅栽以爲  
錫其善地可栽藍艾甘草益母又處處間長藥外  
無他用

貨財則有石炭 木炭 酒 鐵 土鹽 條香

瓦 磚 瓦器 鐵器 蓆蓆 大麻油 毛氈

豆粉 靛 石灰 蜂蜜 黃蠟 棉布 黃絲

絹

產煤頗盛城西六十里外西北山中多穿山爲穴  
深或數丈及數十丈取者携燈鞠躬而入背負以  
出至大路始以畜馱坦途始能車載約東南可鬻

至百里內西北可鬻至二百里內藉以爲生者甚衆然業此者口食之外所餘亦無幾何酒之名色甚多皆以米糧爲之其羊羔兒名重海內然美而無益也鐵出城西八十里外之郭家掌諸村掏沙取之所產無幾止彼處數十里村民鼓鑄器皿近城則多用外來之鐵城東南之土皆有鹽而工多獲少故皆買食平遙之鹽無有煎煮惟城內居民取近地曠土熬之條香春榆樹皮和以水捺爲長條如線物賤而貨遠有賣至陝西者石灰產六壁頭諸村居民房屋多止用磚以煤賤費省故耳鉄

器木器瓦器皆本地能製盡粗甚無佳者蓆蓆亦有鬻鄰邑他如蓖麻子榨油名大麻油毛氈豆粉青靛每不足用蜂蜜黃蠟則所產微甚男婦皆能紡織所製棉布鬻於西北州縣外而棉花則出真定諸處經平遙東來南行靈隰則自孝義轉販黃絹亦以外來之絲織絹明時孝義有解部黃絹今業此者一三家耳

花則有菊花

六月菊

千葉

石榴

水荳

夾

竹桃

牡丹

芍藥

玉簪

鳳仙

鷄冠

馬纓

月季

夜合

蜀葵

金銀花

八仙

石竹

海柿 牽牛 西番蓮 罌粟 金菊 木芙蓉

鳥則有鶯 燕 雁 布穀 班鳩 鷓鴣 黃頭

兒 白頭翁 黑串兒 老鵬 鴉 鵲 雀 鴿

諸花與他州邑所產無甚異菊有五色次則石榴  
水荳夾竹桃水荳花生水邊淡紅色每漫地而長  
平若鋪錦鮮燦可愛牡丹乃山牡丹非洛陽牡丹  
也色香畧似而體薄瓣止一層多或三數層然花  
亦絕佳鳥則皆在西山中城內外絕少好音其黑  
串兒如燕大有灰白二色能如鸚鵡效人聲他處  
多不聞有此

猛獸則有虎

豹

豺

狼

鷲鳥則有鷹

鷂

毒蟲則有蜂

蟻

蛇

蠍

西山多虎七十里外雖通衢不敢夜行又邑人好養鷄鶩相鬪勝負以爲賭賽並好鬪鷄亦獘俗也物產一冊其間關民衣食日用之切者不惜縷絮言之好鳥嘉卉則不惟耳目之娛亦可調適性情若獸之猛鳥之鷲蟲之毒則其爲害者故並著於篇其他非常產所有與夫有而不多多而無甚異者不具載亦不勝載也又孝民物用仰給外來者甚多則勞農休息而外通商惠賈可毋亟講與

# 民俗

歲時徵逐均類他邑元旦及冬至日咸具衣冠親族  
相拜慶元宵張燈火折松栢枝植於庭院或結爲坊  
端陽中秋重九除夕俱烹羔置酒室家歡聚清明日  
上墳祭掃十月朔亦是日又焚紙衣於墓謂之送  
寒衣二月初二祀土地神初三士子祀文昌神六月  
初六祀園塲神河神七月十五祀神田間以祈秋實  
十二月二十三日祀竈神俱焚香設醴又元旦後擇  
日合衆迎喜神於村外正月初五作紙人擲之謂之  
送窮二十日蒸糕祀神謂之添倉二十五又然謂之

大添倉十二月初一以秣米雜豆炒令爆謂食之可却病臘月初八雜米煮粥謂之臘八粥四月初八具牲醴祀神婦女作醋謂爲醋姑姑降祥日頗重此節而未審所由又訛謂關夫子生辰云

歲時伏臘所謂百日之勞一日之弛而詩有春酒介壽之辭書有服賈孝養之義不必假神鬼爲說也至祀祖祀先而外春祈秋報可也而必合社劇錢賽神演戲實無知陋俗

民業勤苦謀食無他奇技淫巧除農圃之外則負薪掏煤赶騾脚大抵夏秋力南畝春冬地凍則入深山

砍木掏煤或受值代人赶騾馬駝負載遠省其能  
者則受值爲人簿記收掌間有一二開設店舖亦盡  
守株待兔絕少深計機械婦女能紡織百工雖有而  
不精良

椎魯質實能勞其力不能勞其心然不思邪辟則  
可而亦不思義理此所以多無知抵法也

民用儉約室廬衣服飲食俱不慕華靡惟善釀多嗜  
酒西鄉半穴土而居他或砌磚如窰狀不則樸斲數  
椽蔽風雨而已惟富室大家窰房之外復構瓦房窰  
房上或更爲樓亦絕少彫鏤彩繪爾來城廂頗飾衣

冠然亦隆冬不過一裘婦女亦罕艷冶之服鄉民則布絮縷縷終歲不製衣者十室而九良辰佳節七八口之家割肉不過一二斤和以雜菜麵粉淆亂一飫平時則滾湯粗糲而已更有雜以糠粃者多造美酒而善飲隆冬嚴寒時則不能少缺

邑地瘠民貧惜財如寶所食粗糲不堪下咽而獨不能戒酒不惟糜費且一入醉鄉致有破家喪身者是亦不可以已乎此不能以官法制也

民性質朴謹廉尚耻樂善好施最嚴帷薄羣居戲笑亦所不及每歲以姦污事到訟庭者曾不一三少有

婦女倚門遊市拜廟觀劇者貧民其枵腹而不肯爲乞丐鄉黨相禁爲匪間有不肖無貴賤皆不與之齒擔石之家簞瓢施及行路義塚茶亭所在多有西鄉山路村中相約或客商經過日晚不及投店輪日寄宿投餐不計值云

閨門甚肅而節婦不知請旌固緣民間視爲尋常弟賢者維持善俗則於此亦未可怠懈也向時薛頡堡田氏立鄉禁數十條至今無犯者今則所在多有茶亭數多不能盡載義塚之大者則城東三里舊名漏澤園相傳邑人霍焜所捐爲地四十畝

之  
三  
手  
集  
言  
儘北爲義塚餘地歲獲租銀爲賓興之費又城西  
北二里許圪料地六畝康熙四十六年署縣阿爾  
布捐置又城西太山地五畝康熙五十八年知府  
孫阜捐又城北南辛安橋南地三畝康熙年邑人  
張登楷捐又南辛安官道東地五畝雍正年邑人  
劉世宏捐又城西杏樹坑地六畝劉義村言道地  
四畝乾隆年邑人李煥捐

民情勇往敬神明而急公事三家之村必有一廟裝  
嚴壯麗勝民居十百者往往而有歲時伏臘必設几  
門外以望祀天地及神祇錢糧從無逋欠官長公事

苦亦無言或一鄉一村有公衆事亦如約無  
預後者

邑人動則祀天地村社多祀關帝是猶庶人而貢  
公侯也神豈欲乎他淫祀不能悉數公事固不宜  
懈若如賽神演戲之類則雖公不義夫知敬神明  
而不知敬祖宗知畏官法而不知畏父兄則亦不  
辨之故耳

民習簡畧古尚慶弔多儉不中禮其周旋禮儀揖讓  
威儀尤不知講婚禮有納絰親迎而不知合巹新婦  
不謁祖夫婦無交拜亦不同拜嫁娶多於除夕前

日取其酒食之便更有乘父母殯葬日成婦及同姓  
爲婚者實悖禮之極祭尤簡畧平民知荐於寢不知  
有祭也惟士大夫親喪必哭踊三日始入殯成服七  
七之期亦頻設哭奠差爲近禮其祖祭虞祭執紼俱  
不知也至附身附棺則士庶均從減省焉

或謂無財不可以爲禮而不知溪毛可差於神明  
菽水可承歡於父母況君子不以天下儉其親乎  
然禮不下庶人惟士大夫好學深思以爲民倡耳

民行敦厚而愚里鄰相明黜而不知親睦山鄣

民家遇婚喪疾病事故工作役使羣助而不受仙  
戚無閉糴者富室更出粟賑給如某等已載入列傳  
族姓則同祖兄弟卽與隣居無異稍遠則昭穆亦不  
辨若又異里則並以爲族亦不同婚姻明知同姓亦  
不避有產之家又每撫育異姓於是以乙冑甲往往  
相亂著姓亦無家廟舊時霍氏辛氏曾修譜牒後亦  
不聞聯宗認族今監生田裕樞生員李垠創祠堂於  
居室之外或亦颺風之將轉乎而於里隣姻婭過於  
親厚如男子成婚次日旣拜父母卽往隣家遍拜有  
令新婦亦往遍拜者又男女殤者兩姓彼此移柩合

考索異言  
葬謂之冥婚遂如姻婭

辨族姓所以敦一本明人倫也今視鄉黨如兄弟  
於鄉黨誠厚於兄弟不太薄乎異姓有撫育之恩  
事之如父似也而生我者何在乎夫莫重於人倫  
而此之不辨何從而有孝子悌弟也古者買妾不  
知其姓則卜之今且明知故蹈設有昭穆倒置於  
心忍乎惟士大夫知立家廟序昭穆敵俗庶可挽  
也

士習樸陋守故常而寡聞見讀畢四子書知字義便  
握筆爲文旣獲一衿則守其所得不求竿頭進步矣

昧者自謂已足不則其心廢棄不惟不進且退人  
不敢望今人之賢者其桀黠則更炫其堅悍頑固之  
學以倡之士焉得不卑習焉得不靡至謂學往往認  
音不辨義如夢覺如夢覺如是則書教為覺更亂以方

音如同為志及為院之類甚多賢者亦不免焉  
昔人謂文章分南北為圖於地氣而實不然余歷  
次考課生童中多英姿茂質而不能文每憾無為  
講授者又恨毀廢書院莫能為之振興培植按孝  
義在前明科第接踵名賢輩出 國朝則登鄉會  
榜者亦寥寥則亦不教不學之故爾

民氣倔強言訟好鬪少柔和稍拂其性卽號哭鳴冤  
人佩利刃每酒後氣生輒割人胸腹其心不甘雖極  
刑弗服也他事亦多敦厚獨忍於兒文問向時兒女  
殤棄諸道傍乾正九年知縣汪錫以磚砌洞於南北  
二郭門外令兒殤置於其內嚴禁拋棄今則多知  
葬埋并不棄諸洞中矣然稟忤逆者猶時時而有豈  
重懲終弗悛情

人有七情惟愛河難斷而所愛又惟兒女爲最

邑此風亦剛暴之氣未馴也 按越誌載民厚

尚信又載其民有先王遺教君子深思小人儉

又民性敦厚婚喪隣里相賙而不吝又民多儉嗇  
健訟好事鬼神於今誠然而所謂知義好文則不  
可多得豈今不古若與

論曰民勞則思善民貧則思薄因其思善而導之  
以禮猶易至於恩薄而漸之以仁則難其責不在  
下而在上也爲之勉強苦禁遊食淫祀以豐其蓄  
講理義人倫品節以破其士民喬野親疏無別之  
愚隨地因人循次第以理之猶懼不及况鹵莽滅  
裂其間乎

三才集言

卷之八

